

保越錄

元

無名氏

撰

至正十八年冬十一月戊戌浙江等處行樞密院副使
呂公珍來鎮紹興時邁里古思遇變之後越民思之如
失怙恃公至祭而哭之拜其母于家中嚴肅號令安和
人民百物安堵上下賴焉大軍自取蘭溪勢益猖獗十
二月甲甲克婺州至正十九年春正月庚申越城嚴備
公命所屬將士講畫方略以爲備禦乃相與羅城外雖
有排柵阻水益固而戰船往來俱得便利瓮城逾河增

築月城上起望樓周列廬舍聚石壘木以爲備立砲架
開箭窗樹屏檣施弔橋傍置兩門以便士卒出入城外
復起土壘石磴左右拱翼以爲外護度大兵必至乃督
城外居民悉遷城中毀居宇近城者清野以待之二月
大軍哨略村落執民爲向道不從者輒殺之丁卯自諸
暨分三路一出楓橋古博嶺天章木柵至亭山一出江
窰王闢茅洋滴渚至載旂山一出街亭象路鑄石嶺平
水至九里己巳大軍皆集首將胡大海僉院楊景指揮
朱保同僉憲同僉何同僉謝院判等分管劄寨置立窩

鋪連延不絕先是長槍軍暴于諸暨公逐之出境及苗
軍與我軍有故怨歸大軍致毒于我苗軍楊指揮等壘
于西直常禧門長槍軍從甯同僉壘于東直稽山門皆
爲先鋒軍公命我入爾思不花朱文選守迎恩門百戶
宗之傑唐元臣蔣廷節莎班馮遇春湯成顧直全房璽
佐之命元帥顧得興守常禧門萬戶劉得興朱榮馬愈
陳亮呂振顧興劉得旺林定江朝宗佐之命元帥元信
胡大有周元守植利門萬戶鄧世全陳裕華琢田英佐
之命將軍田希仁萬戶丁興祖守稽山門萬戶王翼裔

福陳祥謝運楊貴佐之命元帥包王守五瑞門萬戶徐
鎮苗一忠卞得全葛升佐之命元帥劉宣守都泗門兼
守昌安門萬戶費伏初僧會真秦泰鎮撫張貴和佐之
命總部下軍校分守信地城南鮑郎山則植利門將帥
兼守之城北戒珠山則元帥禿滿迭兒鎮撫陳清守之
城東吹沙灣則元帥葉文舉萬戶潘宗金勝守之城西
龐公池則萬戶康伯顏帖木兒守之總管焦德昭萬戶
吳元亮楊春戴德蔡旺各以本部居中軍調遣命總管
楊昶千戶馬俊張德勝趙義周元唐完各以先鋒居帳

前隨行接戰令總管岳忠錢保尤全陸元馬飛萬戶楊
仕全江遇龍何清高戒張旺千戶袁禎胡廣章茂光哲
各以騎兵出入從衛團結四隅義民守護策應以部長
統禦長禦長統社長社長統保長保長統甲首設部司
以統轄之東南隅王克名余思齋付尉唐元壽尉丞唐
壽謙東北隅部尉殷謙善趙衡尉丞唐榮總制于上而
調度之御史掾吏陳修行樞密院都事俞堯臣上下協
心一爲守備位置既定乃開門延敵公與將校議曰敵
勢遠來利于速戰而城外多水非用武之地汝等誠非

躁進以寡禦眾以逸待勞觀其動靜與之持久此吾志也遣掾吏吳瑾之浙省議兵食禦備事庚午大軍攻常禧門我軍以騎兵戰船並進居民登城守護大軍馳突詬詈肆侮總管焦德昭倪昶等分部接戰公躍馬向大軍陣有一騎迎公公叱之曰汝是誰我舍命大王也語未畢公揮攬杈已中其頤遂擒以還大軍披靡元帥顧德興萬戶丁興祖馳突之大軍引退行臺官屬皆集臥龍山上公還入城御史大夫慶童舉酒迎勞以所乘馬贈公辛未大軍攻稽山門我軍禦之以石炮火筒擊之

其先鋒應手而斃二人大軍阻春波橋下我軍據三橋相望詬詈一進一退至晚各解散我頭目龐成擒獲押子一人御史大夫賞官段一匹公命爲百戶是夜以舟師燒何山大寨分省平章張仕信遣元帥張世諤漕杭州糧一萬石由官河至紹興後因艱澀世諤乃自浙江出海逕達三江我軍陷在諸暨者祖繼來歸公連日出城攻大軍耆老請一城之命懸于公願無輕出公曰大軍初至其勢方銳吾不身先士卒以挫其鋒誰肯出力自是連日出戰皆捷獻馘執俘士氣增倍人人思奮大

軍見公鎧甲輒引去丙子大軍乘鮑郎山運積薪草將填河燒排柵我軍自城上射之以火箭燒其薪草大軍計不得施御史大夫以酒勞諸軍命拘收官馬以助軍用苦城外沮洳往來難沮乃畱徑山下填河接路取禹王廟徑達亭山總管焦德昭萬戶吳元亮以兵帥塞半港廟下斷其往來所塞河道隨復開通命行樞密院掾申華凱君性以鹽換米二萬石以贍軍公連日獲至俘囚公命鞠之其果大軍殺人者方始加戮其餘脅從並釋不問仍給衣食大軍勝諸暨之兵不數日卽抵城下

而大軍之勢益張甚城中人人自危公連日擊退之皆倚恃無復憂畏每交戰城上觀者雜于卒伍中耳目既熟皆恬然不復憂懼市井作息無異平日戊寅公與葉文舉俞堯臣陳修劉明劉宣周巖譚震訴于神前約爲兄弟甲申大軍將黃保元帥收掠錢清掘抱姑堰六十餘丈總管邱宗從公擊大軍常禧門外中流矢于口貫項而出遣指揮張憲至浙江省與諸軍告糧時驛道梗塞由王江以海船渡一夕而至先是海道使客未有行者自是始通辛卯時大軍之勢張人心洶洶鎮撫金三

官奴以私受大軍暗號被罪上下益相疑懼大軍揚言城中民約我舉火爲內應是夜三更城東北上民有火炬使卒奔告言民通大軍約三日爲變公曰吾不負民民豈有負我耶總管焦德昭請以二鼓擊四鼓休擊三鼓及使人察市巷居民皆安寢如常至夜不復語由是大軍聞不能入浙江省元帥賈彪統民守錢清大軍掘吳後小楮埧大軍糧盡太索民船四出抄掠財物米穀婦女孳畜所載不盡者悉皆焚之或棄水中深山窮谷無所不到數十甲之內蕩然一空山陰張正蒙字景思

貴池縣尹士元之子妻韓氏乃鄉先生韓性之女也正蒙仕潮州德清縣務提領葬母南池廬側大軍至正蒙先取先世神主埋之晝竄入山谷閉幕歸見神主棄擲廬屋盡毀恐被污辱與妻同縊死女池奴夜歸家泣不敢哭解尸于地自投崖下而死次女越奴晝匿山中夜歸守尸旁尋亦餓死大軍經歷趙姓者池州人舊知正蒙名訪得其死狀率眾葬之正蒙母棺亦被其發趙復掩之旣而嘆曰今日我葬他人明日未知何人葬我也嘆息而去命元帥府經歷譚震都事周若督義兵築三

江陡疊及各海塘浙江丞相達實帖木兒遣參政丑撤
樞密同僉沙監兒院判朶來相繼統兵來赴援公命于
蕭山縣駐扎守禦山陰南池郁景文妻徐氏蔡彥謙妻
楊氏同避難俱被大軍執驅迫以前二婦度不能脫乃
共往大軍營願取首飾衣服而後從大軍信之既還乃
投井而死大軍發掘冢墓自理宗慈獻夫人以下至官
庶墳墓無不發金玉寶器捆載而去其尸或貫之以水
銀面皆如生被戮斬汚辱尤甚三月癸巳大軍分兵增
寨在西者移 家堰王家山綃山賴山在東者移胡家

奧凌家山益以逼城帳前先鋒軍徐進自諸暨陷大軍
中其意怏怏思不得歸大軍千戶王姓者在揚州之日
嘗與進約爲兄弟遂護送至城下進邀與俱入見公眾
皆意其覘謀疑之公命萬戶楊仕全待飲食與縱觀城
上及諸倉庫既畢請歸去語汝將我爲大元臣子守鎮
城池無以諸暨之失而易我今我城壁堅固兵食有餘
又何患焉汝等若不早去徒送死耳乃與銀盃一個官
段一匹命仕全送出常禧門而去御史大夫命元帥禿
滿迭兒以帳前軍二百人弓箭手二十人赴軍前聽調

山陰項里徐本道妻潘氏年二十六歲嫁夫三日大軍至殺其夫見潘氏姿色曳迫以前潘氏曰我行不亂且夫吾方死不忍暴棄遺骸願將焚化隨去庶絕吾念否則有死而已大軍從其言爲拆民屋積而焚之烟焰方熾潘氏臨哭之遂投火而死城民傭保之徒數百交憤大軍爲患致民庶失業諸軍前自陳請出城擊大軍公不許太尉張仕誠遣元帥曹逞義鍾九皋運嘉興米十萬石黃家灣出海以達三江時迎恩門以東五瑞等六門皆受敵惟昌安門無虞使命往來商旅出入舟車糧

餉紛紛旁午爲一城咽喉之地萬戶費伏初守備得宜察而不苛萬民甚便之丁酉大軍率眾攻常禧門大軍之勢尤甚始交鋒社壇前我軍不利元帥顧德興中箭傷足總管錢保中箭傷臂大軍進據跨湖橋我軍退土壘又退月城大軍遂突而入我軍人馬披靡相顧失色城上觀者擾亂奔潰城中居民爲罷市上下大懼時公在戰船中叱諸將曰今日至此尙畏死耶乃自上馬執攡杈突入大軍陣叱之少卻總管倪昶尤全共翼公爲先鋒刀牌手分左右齊進元帥張子武萬戶劉得興率

甲上繼之大軍奔潰乘勝追北至大軍寨而還先是城中鳴禁鐘以聲疾徐如大軍緩急然未嘗擊也是日民既駭懼或人擊鐘公怒命止之戒後勿擊仍禁民登城觀望自後交戰民皆不知公每擊大軍回至府中卽出金帛賞諸軍分輕重俘獲多少各與擊賞莫不歡悅大軍連日攻門我軍分番出擊多所頒獲大軍皆預寫佔屋帖子藏身欲伺攻破之日貼佔屋會稽義兵仇萬戶與姪近忠團結鄉民斬木爲鹿角寨鑄石嶺內設強弩聚民守之大軍至屢爲所傷後大軍大攻之遂破近忠

遇害近忠妻子皆被執太尉遣元帥徐昞徐忠堅統兵來赴援江浙分省劉志堅于杭州領萬戶姚世隆領兵來會俱屯錢清復以事取志堅復領部兵入城己亥常禧門外與大軍交鋒御史大夫勉勵諸將各加賞賜又以繡段增賞萬戶劉得興得興爲人悍勇善能發矢軍中號爲弩箭劉是日單騎迫大軍至寨時農工已興城外不能播植公深爲之慮乃令民于城內預布種秧居民連日守城公慮妨其業乃俾上戶五日中戶三日下戶二日得更輪日相代單丁老弱者免辛丑大軍決蜀

阜垣又採樵木梗竝木塞垣義兵爭之不果而去元帥
張士俊送軍至三江口爲海賊劫奪江浙省檢

官韓惟仁領所部義兵殺散賊人獲送糧米入城分
省平章賞之以惟仁陞浙東宣撫副使僉都元帥府事
御史大夫以倉糧及庫藏金帛助用癸卯大軍擁突至
迎恩門我軍對陣門外道狹多水大軍爲我軍所擠皆
陷入泥中弓弩齊發射傷甚眾大軍將觀音奴馳突我
軍千戶朱子明逆擊之觀音奴陷其坑萬戶朱之傑擒
之以還乃胡大海義子也請以金銀馬匹來贖不許至

夜我軍逃歸者言大軍明日早攻城公命勇士分伏兵
排柵內甲辰大軍首將建大阜纛旗于亭山號召各軍
我皆出拒戰約有萬人彼軍負薪積篠于城外填河接
路東連延不絕四面竝進運載竹梯鉤索至城下鼓勇
彼軍恃勢馳突未幾猖獗特甚各門將士嚴隊固守千
戶馬俊等以先鋒持擊壯士延河而進以火筒應時竝
發大軍不能支退而復合矢石交馳搏擊之聲自夜達
口百戶陸勝目中其箭剗睛而出其鏃公陞爲千戶乙
巳黎明自迎恩門至五瑞門大軍陣皆布列公命分門

拒敵躬自起督初公在常禧門外用雙刀入大軍陣內
大軍以鉤鉤公首鎧公揮刀斷之公下馬持攬杈奮擊
流矢亂射公傷其指總管馬飛萬戶江遇龍共追大軍
擁公而還大軍將寧同僉督攻稽山門我軍驍騎直前
衝刺其馬寧同僉下馬幾爲我軍所擒彼眾扶上馬馳
遁 千戶擊之至二更方止是日遣元帥張子武
還平江指揮張憲與萬戶趙世隆引兵出哨白塔等處
憲在軍中不避艱險性梗直每委以追警督令之事丁
未御史大夫率僚屬致祭於城隍廟祝詞云云至正十

九年夏五月 日大軍攻燒福嚴決官塘二十餘處元
帥徐昞自錢清引兵馳救大軍遂于福嚴駐扎議決抱
姑堰戊申掠會稽至柵頭執鄉民馮道一妻殺之其弟
道二妻年少大軍謂曰從我則爲妻不從我則死婦曰
吾願就殺不爲妻也大軍喝令正立婦引頸受刀首墮
于地我將蔡希仁于稽山門城上置砲架大軍各門立
砲架庚戌萬戶鄧思忠義兵千戶周君佐陳志端潘偉
丁吉甫何元道元帥徐昞等親率義夫三千人築抱姑
堰元帥徐昞躬督視三日功成而畢思忠君佐以下賞

勞有法時久雨水溢大軍每出戰不利彼歸婺州者相繼于道不知者往來于城外伺其動靜其頭目軍校多有避降者公皆賞賜安慰之命戰船自東門出者入西門西門出者入東門經日追哨不絕遇夜遣人逾河砮排柵察守者勤怠次日賞罰浙江行省以豬五十羊五十牛二十酒十罌來勞軍士壬子大軍率眾舉旗鳴鼓分隊而出戰于郊忽暴雨大至委頓而還大軍若求售公戒居民儉食用山會二縣排坊里正役繁賦重公聞之責曰鄉民破殘其可催辦且大軍之勢如此民命朝

不保夕爾輩還可爲兼取計耶悉命放罷公見大軍之勢未退恐城中食少每勤民節用謂食肉者吃菜食飯者吃粥又禁米不許出郭貿易所得米輸于官授以文券至杭給還之由是食貨阜通無滯監軍器局萬戶戴本忠千戶張世英以事得罪命分省鎮撫所知事代之甲寅復決抱姑堰元帥徐昞率民再築興元帥賈彪拒戰傷其臂彼將胡大海幾獲之得河船二百隻時城外多水大軍不利吳後小楮芻阜諸埧破決隨卽築之抱姑堰當江潮衝鬻易決而易塞至是堰旁扎寨聚民水

陸夾守西門守帥葉成往來巡哨尤謹由是自堰以東
大軍不敢至丙辰大軍攻半港水寨我軍竝出當敵萬
戶申智欲以騎兵旁出要衝拒戰良久大軍潰去百戶
景旺被箭中股鏃入骨鑿而出之太尉出金帛賞功院
判近里古思等官有差復以米萬石濟城中貧民我軍
燒家庵寨大軍復再至戊午元帥劉宣數請擊大軍公
不許是日稽山門大軍請宣復稟公許之部下將施伯
顏素驍勇督其眾以戰時大軍以設伏兵於春波橋下
大軍交鋒佯敗伯顏追之大軍令兩翼當前伏兵四起

伯顏下馬步鬪手殺數人力不能支遂陷被擒己未大
軍已得伯顏頗驕矜麾眾復直至三橋將窺城門我軍
列陣于橋南兵刃接而復分百戶商華以刀牌突陣奮
擊殺一人大軍奪其尸昇去公坐城樓上見而壯之賞
錢五十緡元帥劉宣賞段一匹時造軍器數多木炭殆
盡公命伐木于城中燒造又起竈燒石灰皆務吏尹彥
良掌之山陰義兵千戶周君佐屢獲大軍人馬以功陞
萬戶復署爲常州吏大軍爲書射入城中諷公以同保
富貴公笑而焚之至正十九年四月癸亥總管焦德昭

學海類編 卷之三
于稷山置水陸寨以遏大軍衝突招撫居民前后燒毀
大軍倉塘等六寨大軍于城東江岸放決杜浦小金鯉
浦諸埧義兵隨築之丙寅出諸寨兵沿河岸而陣漸迫
越城公坐戰船中輒慢罵飛矢雨注眾多怒欲擊之公
方食令諸軍曰不伺命而輕進者斬之大軍以我軍怯
少懈公乃捨舟乘馬執攬杈衝前陣總管岳宗陞源從
公後大軍將攬杈中公公格去以所執攬杈刺其馬胷
盡刃馬倒彼將墮馬幾被公獲大軍披靡南臺通事不
花善騎射以大夫率眾而出怯薛丹阿出中箭貫目而

死己巳大軍將農遣水軍數人至常禧門外潛伏官河
中以稻草覆身分布兵翼而進之公五馬跨湖橋上見
水浮草云下敢有伏兵乎命游騎搜之果得水軍于是
邀擊俘獲殆盡大軍又攻稽山門逾春波橋大軍將蔡
元帥鎧甲坐胡牀指揮其眾我軍以火箭射而仆之大
軍徑昇之還寨先是大軍所恃者騎兵每出皆爲先鋒
我軍多掘坑布竹簽鐵菱又置竹牌泥中彼馬顛仆皆
爲我軍所獲自是騎兵少出矣丞相以至元鈔三十貫
錠銀盃五十官段五十束勞軍士鄉民陷大軍寨者多

逃歸公命撫安之郡人王冕字元章負氣偃蹇居九里
山中大兵至民皆避兵入城冕獨不入大軍執而欲殺
之自言善能韜略兵書得不死大軍將謝僉等資之偕
行至婺州領見

太祖高皇帝于軍門請定官額陳設攻取方略

上大悅卽

命授以重任命軍前督眾攻取紹興復治攻城器具又
定決水之策書圖本以示諸將辛未常禧門外交戰大
軍首將王老哥臨陣萬戶楊仕全策馬迎之刺傷老哥

老哥乃大軍中勇將是日幾被獲之大軍欲往昌安門
絕我糧道乃用王冕計自遶門山潛逾官河至石堰結
寨太常山石佛寺一旦而成公命元帥包玉總管倪昶
急攻之火筒炮石之聲晝夜不絕壬辰總管焦德昭自
曹娥引兵至石堰與昶軍會德昭會眾曰彼寨兩日不
破方得其志且不虞我來宜示以不戰伺其懈而擊之
乃分調萬戶張英守彼寨北門千戶梁得成徐旺守南
門德昭倪昶同萬戶倪元亮申智周展興蔡旺守東門
待巨螺吹動三路齊進大軍見我軍解甲休息果不爲

意萬戶陳傑首出哨獲三人兵勢四合自辰至午大軍出戰數不利張英率眾先進仆其排柵獲大軍元帥及所乘馬諸軍鼓噪而入義兵千戶何元道邵文斲以鄉民赴之廬舍焚之大軍棄其糧奔凌家山寨擒獲者四人殺傷及溺水者甚眾元帥包玉萬戶徐鎮引兵要其歸路獲馬七匹大軍寨既破公令郡長率民拆其排柵凡十餘里乙亥至常禧門挑戰數合至晚解散公與倪昶等潛躡其後至中堰胡大海寨內軍校大呼而前大軍惶怖不知所爲且進且卻士卒有逾垣而赴水死者

我軍從而擊之獲大將二人先鋒三人馬二匹而萬戶河清中流矢傷目大軍自石堰之敗人馬散亡甚眾頗歸咎王冕由此疏之大軍督燒五瑞門夜則歸凌家山營戊寅大軍將張彪自諸暨引兵攻蕭山守者不能禦大軍焚燎烟焰障天潰卒逃民渡江者如蟻庚申分省發兵救蕭山公遣人會合三江守禦元帥韓惟仁領義兵亦至大軍懼又于北幹山上望見漁商海船三百餘艘集江上大軍疑我軍至遂收掠財物孳畜而去公命惟仁招復居民整治官府萬戶呂誠守漁浦團結義兵

勇卒備禦甚嚴民始安業大軍于植利門外填接河路
首將吳大有率眾射之大軍回射大有中頤千戶吳成
急趨上前以鎗刺之而斃大軍公壯之陞爲萬戶城外
霖雨不止水潦泛濫于大軍寨下時溽暑鬱蒸疫癘大
作大軍首將祈禱南鎮不應乃毀其像仆砭石元帥劉
宣日日巡警城中體察奸細壬午我軍擊大軍禹廟下
會稽義兵千戶邵文敦守護鄉井臺省擢爲崑山州判
官大軍旣失石堰欲窺昌安門及于官塘抵西施山建
板屋百餘間欲扎營山下義兵燒之不果而去水軍鎮

撫張文中與兄彥初潛通大軍爲內應事覺伏誅戊子
大軍至稽山門交戰東廊門守帥劉顯引兵接應被箭
貫右足脛分省右丞謝寶璽自餘姚遣使軍前請帥萬
人入城應援總管焦德昭于曹娥迎護渡江公遣椽吏
龔瑾以糧二千石官段百匹勞軍命海舟送至杭州至
正十九年癸巳嚴州建德縣典史于福兒陷在大軍營
使飼馬至是以胡大海所乘馬來歸丙申大軍過東廊
門公半戰船中命左右射之斃其一馬大軍引退公復
至稽山門督戰公每擒獲大軍多不殺釋之放還公戒

學海類編 卷之二
曰謹毋再來再來將不利汝後有再來亦釋之有三五
次者其人投械拜伏蓋公在陣日久知敵情態矣人感
公威德皆畏焉以白金二百兩賞勞四隅義兵戊戌大
軍攻常禧門我軍相持久之遣先鋒接戰勝負未決與
萬戶楊春戴珍等以鐵騎衝之大軍奔潰多溺水死獲
元帥戈宗傑及馬二匹而還公歎曰可惜楊長不在若
在可得十馬萬戶杜全是時病瘡未愈遣椽吏龔瑾元
帥府吏譚零至太尉議軍事太尉以瑾爲本院都事分
臺官流之在婺州也韓璫爲楊迪從焉璫爲椽吏迪爲

諮議其妻子皆在紹興璫迪潛附書與親友土友文等
屬攻城將士來送妻子至婺州書爲邏卒所獲官執友
文等公曰韓璫楊迪不過爲妻子計耳非有官事誰無
親戚此有何罪公命焚而釋之大軍復窺昌安門自西
西施山築路至羅山莊距門幾及一里萬戶費伏初引
兵擊之大軍乃退癸卯大軍祭旗意舉火攻城甲申大
軍編竹爲笆捲笆內施木拒推挽而至欲用填河渡軍
及爲竹牌板屋輓梯轆轤等具連載悉赴城下分門攻
城甚急守將胡僉院審同僉等攻西門指揮楊景元帥

黃保攻常禧門謝院判何同僉攻稽山門朱保同僉書
總管等攻五瑞門四合竝進我軍未及布陣大軍諸將
已擁入土壘挨牌節次而進月城之下少卻總管倪昶
以甲士迎敵奮擊斬其挨牌八人左右二門我輩竝出
犄角兵勢大軍步騎相蹂躪多墜濠塹中復爲拒戰我
軍統騎呂天保軍突衝大馳陣馬躓被獲公與總管焦
德昭麾眾竝進各門守將率眾併力相拒矢石齊發喊
聲動地大軍之勢稍斂是夜大軍以板屋竹牌聯比布
列架木爲柵庇身柵上去月城不數尺公戒城上民安

臥無喧嘩大軍詬詈至三更不已我軍以火箭燒其竹
牌板屋大軍擾亂徹夜己巳天將曙大軍列陣于門外
飛矢如雨又以火箭鐵彈丸射入城中其鋒疾不
可當我軍死戰萬戶丁興祖率麾下當三橋西中飛矢
拒守不退居民連日作粥糜齎酒分門飲食我軍將士
亦奮力擒獲彼帥及人馬是日大軍攻擊西門甚急公
身先士卒繼其後巡視諸門一日往返四十餘次丙午
大軍之勢益熾皆致死將登城御史大夫慶重率官僚
禱城隍廟及武安王廟我軍悉出土壘布陣接戰矢石

交馳分合數次互相勝負至午後暴風忽起飛石揚沙
塵埃蔽而人馬不能正立大軍將旗俱折器械鋪舍縱
橫散亂白晝晦冥我軍乘勢擊之接刃于風塵間人馬
不相見大軍以四舟編連而行上積枯薪乘風縱火直
趨城門步卒繼之公命海軍于河北岸鉤致其舟助以
火箭頃刻焚而盡甲士沿河鏖戰以拒大軍我軍皆列
河北風勢轉急一舟飄南千戶郎成及戰士九人皆陷
大軍中公怒遣元帥焦德昭倪昶等共逐大軍過虹橋
南悉燒其捲筴竹牌攻城之具盡被我軍所得有載草

船千餘艘常禧稽山五瑞諸門大軍驚亂逃遁歸寨聞
風木之聲皆疑人馬以是奔走蹂躪死傷甚眾元帥
二人丁未收拾其眾復來逼城我軍敗之是時兩日交
戰軍士衣不解甲排柵及城堞上流矢皆滿城外望見
城中常有紫雲覆護戊午大軍復至苦戰不退我軍擒
獲張元帥及士卒人馬凱噪而還大軍人馬連夜不得
休息屢合屢敗攻城器械悉被燒毀又殺傷死亡勢已
窮迫欲引去又恐我軍襲其後陰遣老弱疾病者先歸
己酉大將首將胡僉都等自燒其營先遁指揮楊景何

同僉望見火熾同僉朱保攻五瑞門遁大軍各離心號
令出于不一或前者已去後者不知或烹而未炊或炊
而未食資裝器械委奔原野于是相怨相讐摻戈相刃
紛爭而去公督軍校分兵趕戮秉勝逐北大軍步卒先
行騎兵後殿總管倪昶錢保等追彼騎將及之騎回顧
曰汝不知兵也耶馳人不赶上倪昶曰休走好男子騎
曰今日好男子被呂家趕散汝毋追我昶等不追遂還
大軍又至爲鄉民要殺不敢近金帛輜重息皆奪之公
坐城上見居民出觀大軍寨嘆曰民患大軍攻城三月


餘矣公命居民悉取大軍營內財物所掠民間婦女紛
紘田野公命入城中聚大善寺給以衣食聽還完聚又
遣官屬詣各村招諭避兵人民復業耕種掩瘞尸骸之
暴露者至正十九年己酉御史大夫慶童巡城賞勞各
門將士先是城中牛畜抄掠入市屠賣者多命禁止軍
士有獲大軍營內牛者官給米易之令人收畜至是多
給鄉民耕種陞總管焦德昭爲將軍萬戶秦希仁劉得
興丁興祖爲元帥以下將校論功陞賞有差長洲縣主
簿蔣志道有才幹往來浙西提督運糧又于杭州置備

軍器火藥供給無失至是辟爲椽吏初公命椽吏葛榮
總管諸暨大軍奄至眾力屈不能敵請休兵榮不可軍
潰被執送婺州大軍屢欲殺眾將止之遂至績溪榮脫
繫冒險來歸公俾爲椽吏如初命簿尉司增城高五尺
浚濠河增開十丈城北立窩舍置木堯以耆宿韓昕南
督之民兵岳宗唐元壽等建公生祠于臥龍山之西麓
公諱珍字國寶安豐人係出故宗保相之後爲人儻
有大志偉貌多才沈毅英斷臨敵應變從容不矜量事
任人各當其才賞賚士卒無所靳惜招懷降附待以不

疑故人樂爲之用將帥軍士或有異志輒先覺而後處
之無蹤尤人所難也守城之日陷陳摧敵身先士卒前
後斬俘虜獲幾千餘人節次歸附數百人萬戶馬顯祖
等數人生擒元帥戈宗傑張元帥謝元帥等五十餘人
馬三十匹散軍頭目奚啻數百人大軍退之日論功推
勞皆歸于下及報命太尉首以諸暨喪師請降歸咎已
職太尉不許公曰紹興城池堅固民心易附于保全不
足爲功自諸暨失守故大軍得至城下今若不責珍罪
大軍必謂太尉幸紹興之僅存而置諸暨于不問矣非

學海類編 卷之三
所以明綱紀正王法故珍願就貶降以示不忘諸暨且將士知珍之罪固請不已太尉從之自是但僉院置職未幾御史大夫以功狀上經略使陞同知院事公及拜命進退動止一遵禮法不以祿位留意初至越未幾人民有以牛酒請勞軍士者公不受曰院判邁公惠于此邦爾民賴之今我之來既不能善政以庇蔭于汝等且亦無德及于民不可卻之公以全城自任其立心已見于此况兼紀律之嚴調度之密恩威並用賞罰有章故能內輯羣情外攘強敵保城于既危生人于再造卒以

成其功云



國家圖書館, NATIONAL CENTRAL LIBRARY, TAIWAN, R.O.C.

皇清類編

三

三

三